

冊府元龜


七百八十四之七

七百三十六

| | | | |
|-----|----|------|-----|
| 三〇〇 | 二七 | 五三四五 | 漢書門 |
| 冊 | 架 | 函 | 號類 |

| | | |
|-----|----|------|
| 三五〇 | 一 | 五三四五 |
| 三〇〇 | 二七 | |

| | |
|------|-----------|
| 內閣文庫 | |
| 番號 | 漢 5345 |
| 冊數 | 300 (236) |
| 函號 | 365 6 |



冊府元龜

淺草文庫

淮南李嗣京參閱

西極文翔鳳訂正

豫章黃國琦較釋

總錄部

壽考

洪範五福其一日壽詩人之迹黃耆易象之紀大耋
皆其事也蓋夫民稟天地之中以生其扎瘥大闕中
道而殞者不可勝數矣乃有鯨背齟齒儲儲華皓而
筋力靡耗精爽不衰以至飾巾待期啓手無恨此乃

冊府元龜總錄部

卷之三十一

乙

康寧終命盡其天年者歟傳之所載八十九十日耄
百年日期願人之享年及於耄期誠足貴矣三代而
下悉用論次其有百歲以上至數百歲者豈特稟異
氣哉

周太公望呂尚者為太師佐武王平商而王天下封
於營丘蓋太公之卒百有餘年

衛武公年九十五警於國人曰苟在朝者無謂我老
而舍我也必恭恪於朝夕以警我聞一言志誦納之
以訓道

鮒丘人齊人也桓公見之曰叟言年幾何對曰臣年

八十三公曰美哉壽也

老子周守藏室之吏也百有六十餘歲或言二百餘
歲以其修道而養壽也

榮啓期年老白首衣弊服鼓琴樂孔子問曰先生年
老而窮何樂也啓期曰吾有三樂天生萬物以人為
貴吾得為人一樂也人生以男為貴吾得為男二樂
也人生命有傷夭吾年九十餘是三樂也貧者士之
嘗死者人之終居嘗以守終何不樂乎

唐祖魏人也年九十餘會齊楚約攻魏祖謂魏主曰
老臣請西說秦令兵出可曰敬諾遂約車遣之見秦

邊發兵救之

漢東園公角里先生綺里季夏黃公四人年皆八十有餘鬚眉皓白衣冠甚偉惠帝為太子卑辭安車因使辯士固請來以為客

班壹避地於樓煩當孝惠高后時以財雄邊年百餘歲以壽終

伏生者

伏生名勝

濟南人故秦博士也孝文欲求能治尚書者天下無有聞伏生能治召之是時伏生年九十老不能行乃詔太嘗掌故鼂錯往受之
張蒼為丞相免後口中無齒食乳女子為乳母妻妾

以百數嘗孕者不復幸年百餘歲廼卒

馮唐文帝時為車騎都尉景帝立以唐為楚相武帝即位求賢良舉唐唐時年九十餘不能為官廼以子遂為郎

申公楚人武帝遣使迎之至問治亂之事時年八十餘

轅固生武帝時以賢良微固已九十餘

公孫弘武帝時為丞相御史大夫年八十終丞相位劉辟疆為光祿大夫守長樂衛尉時已八十矣

蘇武為典屬國年八十餘神爵二年病卒

趙克國為後將軍甘露二年薨年八十六

夏侯勝為太子太傅年九十卒官

常賢為丞相致仕八十二薨孫賞為大司馬車騎將

軍亦年八十餘以壽終

嚴君平蜀人卜筮於成都年九十餘遂以其業終蜀

人愛敬之

貢禹為光祿大夫上書曰犬馬之齒八十一乞骸及

身出居鄉里死無恨矣

後漢樊重湖陽人賞至巨萬縣中推為三老年八十

餘終

郭伋為太中大夫卒時年八十六

嚴光建武十七年復特徵不至年八十終於家

郭丹為司徒坐考隴西太守鄧融事無所據策免卒

於家年八十七

伏恭為司徒乞骸骨年九十

第五倫為司徒上疏乞身卒年八十餘

馮魴為執金吾建初三年以老病乞身帝許之其冬

為五更詔魴朝賀就列侯位元和二年卒時年八十

六 禮天子父事
老兄事五更

魯恭為司徒以老病策免卒年八十一

郭躬習小杜律為郡法曹掾用法平年九十五卒

袁湯為太尉以災異策免卒年八十六

薛包為侍中稱疾賜告歸年八十餘以壽終

王堂為汝南太守免歸家年八十六卒

李充為左中郎將年八十以為國三老安帝時嘗進

見賜以几杖卒於家

樓望少習嚴氏春秋為左中郎將年八十永元十二

年卒於官

蔡順以至孝稱舉孝廉不能遠離墳墓遂不就年八

十終于家

楊統位至光祿大夫年九十卒

楊厚為侍中病免歸年八十二卒於家

胡廣為太傅錄尚書事時年已八十而心力克壯

盛弘

之荆州記曰菊水出穰縣芳菊被涯水極甘香谷中皆飲此水上壽百二十七八十者猶以為天太尉胡

廣所患風疾休沐南歸嘗飲此水後疾遂瘳年八十二薨也

冷壽光年可百五十六歲行容成公御婦人法

客成公能

修補導之事取精於玄牝其要谷神不死守生養氣者也髮白復黑齒落復生御婦人之術謂握固不瀉

還精補

嘗屈頸鵠息

鵠音居妖反詩曰有雉鳴注曰鵠雉也山海經曰女兒之山

多白鵠郭璞曰似雉長尾尾白鬚髮盡白而色理如三四十時老死

於江陵

許子勳者不知何郡縣人皆謂數百歲

唐虞魯女生者皆與華佗同時唐虞道赤眉張步家居里落若與相及死於鄉里不其縣魯女生數說顯宗時事甚明了議者疑其時人也董卓亂後莫知所在

折像廣漢人能通京氏易好黃老卒年八十四

李邵爲太尉策免年八十餘卒於家

廖扶汝南人州郡公府辟召皆不就號北郭先生年八十終于家

王真上黨人年且百歲視之面有光澤似未五十者

李尤少以文章顯爲樂安相年八十三卒

法真前後四徵終不降君友人郭正稱之曰可謂百世之師者矣乃共刊石頌之號曰玄德先生年八十九中平五年以壽終

檀敷補蒙令以郡守非其人棄家去年八十卒於家董扶學圖讖爲蜀郡屬國都尉去官還家年八十二張儉建安初徵爲衛尉不得已而起儉見曹氏逆德已萌乃闔門懸車不豫政事歲餘卒于許下年八十

四

華佐一名專舉孝廉辟大尉府皆不就曉養性之術

年且百歲而猶有壯容時人以爲仙

其始東郭延年封君達三人皆方士壽皆百餘歲及二百歲

陳寔爲太丘令中平四年年八十四卒于家

楊彪爲司徒免年八十四黃初六年薨

趙岐爲太嘗年九十餘建安六年卒先自爲壽藏

壽藏

謂塚壙也稱壽者取其久遠之意也猶如壽官壽器之類冢在今荊州古郢州城中也

圖季札

子產晏嬰叔何四像居賓位又自畫其像居主位爲

贊頌

吳祐爲河間相因自免歸家不復仕躬灌園蔬以經

書教授年九十八卒

張皓爲司空年八十三卒

魏田豫爲衛尉稱疾乞遜位拜太中大夫食鄉祿年

八十二薨

管寧累徵不至正始二年卒年八十四

胡昭居陸渾山中嘉平二年公車特徵會卒年八十

九拜子纂郎中

焦先字孝然隱者也亡時年八十九矣

一日可百餘歲乃卒

扈累字伯重京兆人初平中山東人有青牛先生者

字正方客三輔年似五六十者人或親識之謂其已

百餘歲矣累隨正方游學嘉平中年九十病亡

張璠養志不仕學兼內外正始元年戴鴛之鳥巢璠

門陰璠告門人曰夫戴鴛陽鳥而巢門陰此凶祥也

乃援琴歌詠作詩二篇旬日而卒時年一百五歲

蜀孟光為大司農嘗直言無所迴避為代所嫌後坐

事免官年九十餘卒

來敏以語言不節前後數貶削後主以敏為執慎將

軍欲令以官重自警戒也年九十七景曜中卒

杜瓊字伯瑜少受學於仕安精寃安術後為太嘗年

八十

夫士燮為交趾太守在郡四十餘歲黃武五年年九

十卒

呂岱為太司馬九十六卒子凱嗣遺令殯以素棺疏

巾布構葬送之制務從約儉凱皆奉行之

晉太宰安平王孚泰始八年薨時年九十三

王祥字休徵為太保疾篤著遺令訓子孫曰夫生之

有死自然之理吾年八十有五啓手何恨

劉寔為司空薨時年九十一

鄭袤拜司空固辭以疾就第薨年八十五

石鑒元康初為太尉年八十餘克壯慷慨自遇若少

年時人美之

顏含為光祿勳致仕二十餘年年九十三卒

何琦養志衡門不交人事前後徵辟皆不就年八十

二卒

許孜元康中郡察孝廉不起巾禍終身年八十餘卒

于家

黃泓魏郡人為慕容暉太史靈臺諸署統暉敗以老

歸家善天文祕術年九十七卒

崔遊為氏池長以病免就家拜郎中卒年九十三

續咸貞素好學為并州從事中郎沒于石勒年九十

七死于石季龍之世

鮑靚為南海太守嘗見仙人陰君授道訣百餘歲卒

戴作吳末為臺吏後託病不仕有神術年八十餘所

占驗者不可勝紀

陳訓歷陽人為諫議大夫去職還鄉善占候年八十

餘卒

丁潭為光祿大夫卒年八十

譙秀巴西人遭蕭敬叛亂避難宕渠川中鄉人宗族

馬依者以百數秀年八十衆人以其篤老欲代之負

擔秀拒曰各有老弱當先營救吾氣力自足堪此不

以垂朽之年累諸君也後十餘年卒於家年九十餘
范粲陳留外黃人爲太宰中郎後稱疾不出不言三
十四年卒年八十四

郭荷維陽人明寃群籍特善史書張祚徵爲太子友
上疏乞還年八十四卒

公孫永襄平人隱平郭南山年餘九十操尚不虧
單道開好山居後入羅浮山獨處茅茨蕭然物外年
百餘歲卒于山舍

宋纖不應辟命張祚徵爲太子友遷太傅不食而卒
年八十二

後秦姚興時西胡梁國兒爲鎮北將軍封平輿男年
八十餘卒

宋傅隆爲太嘗博學多通特精三禮卒年八十三
營浦侯遵考高祖族弟元徽初卒年八十二

顧琛元徽中爲員外嘗侍中散大夫卒年八十六
劉鎮之閒居京口未嘗應召後以左光祿大夫徵不
就元嘉二年卒年九十餘卒于家

王玄謨爲南豫州刺史加都督性嚴刻少恩薨年八
十一

裴松之字世期爲國子博士致仕卒年八十

南齊徐伯珍隱居九嵎山家甚貧窶兄弟四人皆白首相對時人呼爲四皓建武四年卒年八十四

王琨爲侍中卒年八十四

沈麟士字雲禎吳興武康人隱居不仕卒年八十六

梁袁昂爲司空侍中薨年八十

賀瑒爲步兵較尉領五經博士天監九年遇疾卒于館時九十

孫謙爲零陵太守天監九年以年徵爲光祿大夫既至高祖嘉其清潔甚禮異焉每朝見猶請劇自効高祖笑曰朕當使卿智不使卿力十四年詔日光祿大

夫孫謙清慎有聞白首不怠高年舊齒宜加優秩可給親信二十人并給杖謙年逾九十強壯如五十者每朝會輒先衆到公門十五年卒于官時年九十二高祖爲舉哀甚悼惜之

顧思遠鍾離人新渝侯映爲北徐州刺史徵還思遠挺义行部伍中映見甚老使人問對曰年一百一十二歲凡七娶有子十二死亡畧盡今唯小者年已六十又無孫息家闕養乏是以行役映大異之召賜之食食兼於人簡其頭有肉角長寸許遂命後車戴還都謁見天子與之言往事多異所傳擢爲散騎侍郎

賜以俸宅朝夕進見年一百三十卒又普通中北侵
攻穰城城內有人年二百四十歲不復能食穀唯飲
魯孫婦乳問文帝命勞之賜以束帛

荊州上津鄉人張元始年一百一十六歲膂力過人
進食不異至年九十七方生兒兒遂無影將亡與人
告別乃至山林樹木處處履行少日而終時人以爲
知命湘東王愛竒重異留其枕

後魏元法僧爲太尉始安王薨年八十三

裴安祖河東聞喜人州辟主簿年八十三卒于家

長孫嵩太武時爲太尉北平王薨年八十

長孫道生太武帝時爲司空上黨王薨年八十二

嚴稜太武帝時爲中山太守有廉清之稱年九十卒
于家

寇讚爲南雍州刺史讚在州十七年甚獲公私之譽
年老表求致仕真君九年卒年八十六

王憲爲并州刺史及遷京師以憲元老特賜錦綉布
帛錦綵珍羞禮膳獻文帝天安初卒年八十九

李崇獻文帝時爲北幽州刺史卒年八十一
刁雍晉人爲特進征南大將軍太和八年卒年九十

五

高允太和三年為鎮南大將軍領中書監高祖詔允
 議定律令雖年漸期願而志識無損猶心存舊職搜
 考史書談說舊事了無所遺十一年卒年九十八
 尉元太和十三年為司徒以年老致仕十七年七月
 元疾篤高祖親幸省疾八月元薨時年八十一
 羅結代人為侍中年一百七歲精爽不衰後詔聽歸
 老賜太東川以為君業并為築城即號曰羅侯城年
 一百二十歲卒
 梁祚為散令清貧守素不交勢貴年八十七太和十
 二年卒

王瑯閩人也高祖時累遷散騎嘗侍養老於家嘗飲
 牛乳如處子太和二十年卒時年九十卒報時八十
 游明根高祖時為五更太和二十三年卒於家年八
 十二
 爾朱代勤高祖末假寧南將軍除四州刺史卒年九
 十一
 新興公丕仕歷六世垂七十年位極公輔景明四年
 薨年八十二
 傅永為平東將軍光祿大夫熙平元年卒年八十三
 北齊侯莫陳相為太傅汾州刺史武平中薨於州年

八十三

斛律金為太師咸陽郡王天統三年薨年八十二
後周寇雋為驃騎將軍保定三年卒時年八十二高
祖嘆惜之

熊安生字植之武帝宣政元年徵拜露門學博士下
大夫其時年已八十餘尋致仕卒於家

樂遜為東揚州刺史卒年八十二

張羨為司城中大夫卒年八十四

姚僧坦為太醫下大夫至隋開皇三年卒時年八十

五

隋沈重吳興武康人仕梁為太嘗卿後周大象二年
來朝京師開皇三年卒年八十四

裴政開皇中為襄州總管卒官年八十九

楊慶字伯悅開皇中為儀同三司年八十九終於家

庾季才為太史中大夫藝術精通後免職以半祿歸

第所有祥異使人就家訪焉仁壽三年卒年八十八

公孫景茂大業初為淄州刺史卒官年八十七

柳儉大業末以上大將軍卒於家時年八十九

敬肅字弘儉大業末以前潁川郡丞終於家時年八

十

唐裴矩貞觀初爲民部尚書年八十而精爽不衰
歐陽詞貞觀初歷太子率更令加銀青光祿大夫弘
文館學士封渤海縣男年八十餘卒
虞世南字伯施爲祕書監後表請致仕優制許之仍
授銀青光祿大夫弘文館學士祿尋卒年八十一
褚亮爲員外散騎嘗侍弘文館學士後致仕卒年八
十八
丘和爲特進貞觀十一年卒年八十六
傅奕貞觀中爲太史令年八十餘卒於官
李百藥貞觀中任宗正卿卒時年八十五

張俊裔貞觀中爲國子祭酒致仕卒年八十三上爲
之輟朝三日贈禮部尚書陪葬昭陵謚曰康

趙弘智高祖朝爲國子祭酒崇賢館學士卒時年八
十三

張道鴻少遊名山得服食之術後居人間每餌金丹
時年一百四十六歲

甄權精曉藥術爲天下之最初仕隋爲祕書省正字
後稱疾免貞觀十七年權年一百三歲太宗幸其家
視其飲食訪以藥性因授朝散大夫

孫思邈京兆華原人也自云開皇辛酉歲生至今年

九十三矣詢之鄉里咸云數百歲人詬齊周間事歷歷如眼見以此參之不啻數百歲人矣永淳元年卒
李客師衛國公靖之弟為冠軍大將軍總章二年卒
時年九十

許敬宗高宗朝為中書令又冊拜太子少師久之抗表乞骸骨詔聽致仕加特進俸祿如舊及薨年八十

丘行恭為右武侯大將軍請致仕拜光祿大夫卒年

八十

賈敦實為懷州刺史永淳初以年老致仕及病篤子

孫迎醫視之敦實曰未聞良醫能治也不肯服藥垂

拱四年卒時年九十餘

高智周永淳中為左散騎嘗侍卒年八十二

劉仁軌光宅初為文昌左相同鳳閣鸞臺三品卒年

八十四

王及善為內史聖曆二年拜文昌左相旬日薨年八

十二

唐休璟景雲中為朔方道行軍總管卒時年八十六

蘇珣為太子賓客簡較詹事以年老致仕卒年八十

一

葉法善世爲道士法善少傳符籙自高宗則天中宗
睿宗殆五十年數詔入禁中法善生隋大業之丙子
死於開元之庚子凡一百七歲

嚴善思爲左散騎嘗侍年八十五卒善思父延爲徐
州長史子向爲太嘗員外卿皆年八十五卒向兄宙
爲趙郡司馬長向十歲向卒時宙並無恙

張果不知何許人也時人傳其有長乎祕術自云數
百歲矣

王友貞懷州河內人也爲太子中舍人員外制置玄
宗在東宮表請禮徵之以年老竟辭疾不起年九十

餘卒

王希夷徐州滕人也孤貧好道嘗餌松栢葉及雜花
散玄宗東巡勅州縣以禮徵召至駕前時年已九十
六令中書令張說訪以道義宦官扶入宮中與語甚
悅授國子博士聽致仕尋壽終

李元愷博學善天文口未嘗言之年八十餘壽終

王知遠爲道士年一百十六歲

潘師正爲道士師事王知遠永淳元年卒年九十八
司馬承禎字子微河內溫人爲道士事潘師正傳其
符籙及辟穀導引服餌之道卒于王屋山時年八十

九 信安郡王禘天寶二年十月薨年八十餘玄宗聞而痛惜之

孫逖父嘉之進士擢第又以書判拔萃授蜀州新津縣主簿歷曲周襄邑二縣令以宋州司馬致仕卒時年八十二

賀知章開元中為祕書監歸會稽壽終年八十六裴道慶為右僕射年九十餘終於位

王縉為平章時元載用事縉卑附之元載得罪連坐貶處州刺史德宗登極徵為太子賓客東郡留守卒

時年八十三

丘為為散騎嘗侍致仕年八十餘而繼母尚無恙

于邵貞元中終於江州別駕年八十一

郭子儀為尚父太傅中書令建中二年薨年八十五

蕭昕為太子少傅兼禮部尚書致仕貞元七年卒年

九十一

韋倫貞元中為太子少師致仕卒時年八十三

嗣滕王湛然貞元中卒年八十四

歸崇敬貞元中為兵部尚書致仕卒時年八十八

張萬福貞元二十一年以左散騎嘗侍致仕元和元

年卒年九十萬福自始從軍至卒祿食七十餘年未嘗一日病

趙宗儒為太子太傅拜疏請老詔以司空致仕卒年八十七

趙昌元和六年自工部尚書為華州刺史候辭於麟德殿時年八十餘趨拜輕捷占對詳明憲宗退而嘆異宣命宰臣密訪其願養之道以奏焉

閻濟美為祕書監以年邁懸車上表陳乞授工部尚書致仕寶曆元年歿于家年近九十
裴向以吏部尚書致仕享年八十贈太子少保

張正甫以吏部尚書致仕卒年八十三

柳公度善攝生年八十餘步履輕便位止光祿少卿

柳公權為太子少師卒年八十八

王起為山南東道節度使在鎮二年以老疾求代不

許卒於鎮時年八十八

後唐錢鏐為尚書令吳越國王薨時年八十一

馬縞長興四年為戶部侍郎縞時年已八十及為國

子祭酒八十餘矣形氣不衰

許寂授工部尚書致仕十居于維時寂已年高精彩猶健冲淡寡言時獨語奇怪可怪人莫知其際卒時

年八十餘

晉盧損爲祕書監拜章辭位乃授戶部尚書致仕退居潁川時李鱗年將八十善服氣導引損以鱗之遐壽有道術酷慕之仍以潁川通城市乃卜居陽翟立隱舍珠茅種藥山衣野服逍遙於隱凡之間出則柴車鴻氅自稱具茨山人晚年與同遊五六人於大隗山中古宮觀址䟽泉鑿坯爲隱所誓不復出山氣多寒被病而卒時年八十餘齒髮不衰而有壯容周弘知濬父延緘左武衛大將軍致仕年九十餘卒李建崇歷河陽邢州兵馬留後漢初入爲右衛大將

軍年逾七十神氣不衰建崇始自代北事後唐武皇至是四十餘年前後所掌兵麾下部曲多至節鉞零落殆盡唯建崇雖位不及籓屏而康強自適以至期耄太祖卽位授左監門衛上將軍廣順三年春卒贈黔南節度使

晉蕭愿爲太子賓客愿唐宰相做之曾孫也做入相接賓之次愿爲兒童之戲做謂客曰予豈敢得位而喜所幸奕世壽考吾今又有曾孫在目前矣愿年七十餘其母猶在一門壽考人罕及者楊凝式爲太子少師分司於維廣順中表求致政尋

以右僕射得請顯德初改左僕射又改太子太保並懸車以疾薨于第年八十五

册府元龜

册府元龜

淮南李嗣京叅閱

西極文翔鳳訂正

豫章黃國琦較釋

總錄部 三十五

守道 知足

守道

孔子曰士志於道而恥惡衣惡食者未足與議也然則卷懷昏亂養素丘樊不為利回不為物忤杜門謝絕陋巷晏然或琴書以自娛或樵蘇而不爨驕餌不

可誘汙君莫能臣安貞居嘗誓志終老者良足多矣
亦有逃榮避地篤學俟時不歷當塗之門獨樂先王
之道時主欽慕風聲自遠至或濯纓仕籍忘懷得喪
託庇彊宗棲心恬薄端默以自守耿介而不渝愍乎
之操於茲可尚盖聞其風者足使貪夫廉懦夫有立
志者焉

孔子為魯大夫公山弗擾以費畔召子欲往

弗擾為季氏宰

與陽虎共執季子路不悅曰未之也已何必公山氏

之之也之適也無可之則止子曰夫召我者而豈徒

哉如有用我者吾其為東周乎與周道於東方故曰東周又佛勝

以中牟畔子之欲往也如之何子曰然有是言也不

日堅乎磨而不磷不日白乎涅而不緇磷薄也涅可

堅者磨之而不薄至白者染之於涅而不黑喻君子雖在濁亂濁亂不能汙吾豈匏瓜也

哉焉能繫而不食匏瓜也言匏瓜得係一處者不食故也吾自食物當東西南北不得

如不食者物又楚聞孔子在陳蔡之間使人聘之蔡

大夫謀曰孔子賢者今楚大國也孔子用於楚郡陳

蔡用事大夫危矣於是乃相與發徒役圍孔子於野

孔子講誦弦歌不衰子路愠見曰君子亦有窮乎孔

子曰君子固窮小人窮斯濫矣濫溢也君子固亦有窮時但不如小人窮

則濫溢孔子知弟子有愠心召子路而問曰詩云匪

為非

兕匪虎率彼曠野 率循也言非兕 虎而循曠也 吾道非邪吾何為

於此子路曰意者吾未仁耶人之不我信也 言人之不信吾

豈以未仁故乎 意者吾未知耶人之不我行也 言人不使通行而困窮者

豈以吾未智乎 孔子曰有是乎繇譬使仁者而必信安有伯

夷叔齊使智者而必信安有王子比干子路出子貢

入見孔子曰賜詩云匪兕匪虎率彼曠野吾道非耶

吾何為於此子貢曰夫子之道至大故天下莫能容

夫子夫子蓋少貶焉孔子曰賜良農能稼而不能為

穡 種之為稼 歛之為穡 言良農能言種之未必能歛獲之 良工能巧而不能為

順 言良工能巧而已 君子能修其道綱而紀之統而

理之而不能為容今爾不修爾道而求為容賜而志

不遠矣子貢出顏回入見孔子曰回詩云匪兕匪虎

率彼曠野吾道非耶吾何為於此顏回曰夫子之道

至大故天下莫能容雖然夫子推而行之不容何病

不容然後見君子夫道之不修也是吾醜也夫道既

已大修而不用是有國者之醜也不容何病不容然

後見君子孔子欣然而笑曰有是哉顏氏之子使爾

多財吾為爾宰 宰主財者也為汝主財言志之同也 孔子在衛王孫賈

問曰與其媚於奧寧媚於竈何謂也 王孫賈衛大夫與內也以喻近

臣竈以喻執政賈執政者欲使孔子求昵之微以世俗之言感動之 子曰不然獲罪於

冊府元龜 總錄部 卷之七百八十五 三

天無所禱也天以喻君孔子拒之曰如獲罪於天無所禱於衆神又曰富而可

求也雖執鞭之士吾亦爲之富貴不可求而得之當修德以得之若於道可

求者雖執鞭賤職我亦爲之如不可求從吾所好所好者古又子

貢曰有美玉於斯韞匱而藏諸求善賈而沽諸韞藏也匱

匱也謂藏諸匱中沽賣也子曰沽之哉沽之哉我待賈

者也又冉有謂子貢曰夫子爲衛君乎爲猶助也衛君者謂輒也

衛靈公逐太子蒯聵公薨而立孫輒後晉趙鞅納蒯聵於戚城衛石曼姑帥師圍之故問其意助輒否乎

子貢曰諾吾將問之入曰伯夷叔齊何人也曰古之

賢人也曰怨乎曰求仁而得仁又何怨夷齊讓國遠去終於餓死

故問怨邪以讓爲仁豈有怨乎出曰夫子不爲也父子爭國惡行孔子以伯夷叔齊爲

賢且仁故知不助衛君明矣又孔子疾病子路使門人爲臣孔子嘗爲

大夫故子路欲使弟子行其臣之禮病間曰久矣哉繇之行詐也無臣

而爲有臣吾誰欺欺天乎少老曰間言子路久有是心非今日也且子

與其死於臣之手也無寧死於二三子之手乎無寧寧也

二三子門人也就使我有臣而死其手我寧死於弟子之手乎且子縱不得大葬君

禮予死於道路乎就使我不此君臣禮葬有二又

孟子曰孔子之去齊接淅而行去魯曰遲遲吾行也

去父母國之道也可以速而速可以久而久可以處

而處可以仕而仕孔子也

蘧伯玉衛大夫邦有道則仕邦無道則可卷而懷之



卷而懷之謂不與時
政柔順不忤於人

顏子名回魯人也當世亂居於陋巷一簞食一瓢飲

人不堪其憂回也不改其樂孔子賢之當亂世安陋巷者不用於

世窮而樂道也
故孔子賢之也

曾點字皙皙魯待孔子孔子曰言爾志點曰春服既

成冠者五六人童子六七八人浴乎沂風乎舞雩詠而

歸暮春者季春三月也春服既成衣單袷之時我欲

於舞雩之下歌詠先王孔子喟然嘆曰吾與點也善

之道歸於夫子之門
之能知
時也

曾子名參寢疾病疾謂樂正子春坐於牀下子春曾參弟子

曾元曾申坐於足元申曾參之子童子隅坐而執燭隅坐不與成人

並童子曰華而皖大夫之簣與華畫也簣謂牀下也說者以皖為刮節日

子春曰止以病困不可動曾子聞之瞿然曰呼呼唐僊之聲曰華

而皖大夫之簣與曾子曰然斯季孫之賜也我未之

能易也元起易簣未之能易已病故也曾元曰夫子之病革矣

不可以變幸而至於旦請敬易之言夫子者曾子親沒之後齊嘗聘以

為卿而不為也革急也變動也幸顛也曾子曰爾之愛我也不如彼彼

子君子之愛人也以德成已細人之愛人也以姑息

息猶安也言苟容取安也吾何求哉吾得正而斃焉斯已矣斃休也

舉扶而易之反席未安而沒言病雖困猶勤於禮

澹臺滅明字子羽武城人也孔子弟子也既已受業退而修行行不繇徑非公事不見卿大夫

公皙哀字季次齊人也孔子曰天下無行多為家臣仕於都唯季次未嘗仕

漆雕開字子開孔子使開仕對曰吾斯之未能信仕進

之道未能信者未能究習孔子說善其志道深

柳下惠魯人為士師士師典獄之官魯士師也三黜人曰子未可

以去乎曰直道而事人焉往而不三黜苟直道以事人至之國俱

當復三黜枉道而事人何必去父母之邦

墨子宋人名翟弟子公上過語墨子之義於越王悅

之謂公上過日子之師苟肯至於越請以故吳之地

陰江之浦書社三百以封夫子二十五家為社七千四百家也公上

過往於墨子墨子曰子觀越王能聽吾言用吾道乎

公上過曰殆未能也墨子曰不唯越王不知翟之意

雖子亦不知翟也若越王聽吾言用吾道翟度身而

衣量腹而食比於賓萌未敢言士賓客萌民越王不聽吾

言不用吾道雖全越以予我吾無所用之不聽不用

而受其國是以義翟也何必越雖中國可矣

孔伋字子思孔子孫也魯繆公亟見於子思曰古千

乘之國以友士何如子思不悅曰古之人有言曰事

之云乎豈曰友之云乎

孟子曰子思之不悅也豈不曰以位則子君也我臣也何

敢與君友也以德則子事我者也奚可以與我友

千乘之君求與之友而不可得也而况可召與

孟子為卿於齊出弔於滕主使蓋大夫王驩為輔行

王驩朝暮見反齊滕之路未嘗與之言行事

孟子嘗為齊卿

出弔滕君蓋齊下邑也王以治蓋之大夫王驩輔行
輔副使也王驩齊之誦人也有寵於王後為右師孟
子不悅其為人雖與同使而行未嘗與之言行事不願與之相比也公孫丑曰齊卿之

位不為小矣齊滕之路不為近矣反之未嘗與之言

行事何也曰夫既或治之予何言哉

孟子曰夫人既有自謂治行事

我將復何言哉

顏觸齊人也見齊宣王王曰觸前

使之就已

觸亦曰王前

宣王不悅左右曰王人君也觸人臣也王曰觸前觸

亦曰王前可乎觸對曰夫觸前為慕勢王前為趨士

欲使觸為趨勢不如使王為趨士王忿然作色曰王

者貴乎士貴乎對曰士貴耳王者不貴王曰有說乎

觸曰有昔者秦王攻齊令有敢去柳下季壟五十步

而樵采者死不赦令曰有能得齊王頭者封萬戶侯

賜金千斤繇是觀之齊王之頭曾不若死士之壟也

齊王默然不說左右皆曰觸來觸來大王據千乘之

地而建千石鍾萬石簏天下之士仁義皆來役處辯

知並進莫不來語東西南北莫敢不服來萬物無不

備具而百姓無不親附今夫士之高者乃稱匹夫徒步而處農畝下則鄙野監門閭里士之賤也亦甚矣。獨對曰不然。獨聞古大禹之時諸侯萬國何德厚之道得貴士之力也。故虞舜起農畝出於野鄙而爲天子及至商湯之時諸侯三千當今之世南面稱寡人者乃二十四繇此觀之非得失之策與稍稍誅滅滅亡無族滅亡無族之時欲爲監門閭里安可得而有乎哉。是故易傳不云乎居上位未得其實以喜其爲名者必以驕奢爲行倨慢驕奢則凶必從之。是故無其實而喜其名者削無德而望其福者約無功而受

其祿者辱禍必渥故曰矜功不立虛願不至此皆誇樂其名華而無其實德者也。以是堯有九佐舜有十友禹有五丞湯有三士自古及今而能虛成名於天下者無有也是以君王無羞亟問不愧下學士故成其道德而揚功名於後世者堯舜禹湯周文王是也。故曰無形者形之君也無端者事之本也夫上見其源下通其流至聖人明學何不吉之有哉。老子曰雖貴必以賤爲本雖高必以下爲基是以侯王稱孤寡不穀是土賤之本與非夫孤寡者人之困賤下位也而侯王以自謂豈非下人而尊貴士與夫堯傳舜舜

傳禹周成王任周公旦而世世稱曰明王是以明乎
 士之貴也宣王曰嗟乎君子焉可侮哉寡人自取病
 耳乃今聞君子之言乃今聞細人之行願請受為弟
 子子
 漢申公魯人也少與楚元王交俱事齊人浮丘伯受
 詩元王薨子邾嗣立申公傳太子戊戊不好學病申
 公申公媿之歸魯退居家教終身不出門復謝賓客
 獨王命召之乃往
 嚴彭祖字公子東海下邳人也為宣帝博士至河南
 東郡太守以高第入為左馮翊廉直不事權貴或說

曰天時不勝人事君以不修小禮曲義亡貴人左右
 之助經義雖高不至宰相願少自勉強彭祖曰凡通
 經術固當修行先王之道何可委曲從俗苟求富貴
 乎

翼奉字少君東海下邳人治齊詩與蕭望之等同師
 望之施之事而奉惇學不仕好律曆陰陽之說元帝
 徵待詔宦者署時平昌侯王臨以宣帝外屬侍中稱
 詔欲從奉學其術奉不肯與言後為諫大夫

孫寶字子嚴以經明為都吏御史大夫張忠辟寶為
 屬欲令授子經更為除舍除謂修飾掃除也設儲峙謂豫備器物也

音又紀切

寶自効去忠固還之心内不平後署寶主簿寶

從入舍祭竈請比鄰忠陰察怪之使所親問寶前大

夫為君設除大舍子自効去者欲為高節也今兩府

高士俗不為主簿子既為之徙舍甚說說讀曰悅何前後

不相副也寶曰高士不為主簿而大夫君以寶為可

一府莫言非言大夫以為寶通可為主簿耳士安得

獨自高前曰君男欲學文而移寶自近文禮書也禮有來

學義無徃教道不可誦身誦何傷且不遭者可無不

為况主簿乎言士不遭遇知已則忠聞之甚慙後終

於大司農

揚雄哀帝時為郎待詔時丁傳董賢用事諸附離之

者或起家至二千石時雄方草太玄有以自守泊如

也

桓譚當王莽居攝篡弒之際天下之士莫不近褒稱

德美作符命以求媚譚獨自守默無言後終於六安

郡丞

後漢孔子建魯國人也少遊長安與崔篆友善及篆

仕王莽為建新大尹莽改千乘國曰建新郡守曰大尹嘗勸子建仕

對曰吾有布衣之心子有衮冕之志各從所好不亦

善乎道既乖矣請從此辭遂歸終於家

包咸字子良會稽曲阿人也習魯詩論語王莽末去
歸鄉里於東界爲赤眉賊所得遂見抱執十餘日咸
晨夜誦經自若賊異而遣之後終於騎都尉
杜撫字叔和犍爲武陽人也少有才受業於薛漢後
歸鄉里教授沈靜樂道舉動必以禮後爲公車令
馮衍更始時爲立威將軍更始使鮑永安集河北永
以衍領狼孟長屯太原光武卽位遣使者招永衍不
肯降審知更始已歿乃共罷兵幅巾降於河內帝怒
衍等不時至永以立功得贖罪遂任用之而衍獨見
黜永謂衍曰昔高祖賞季布之罪誅丁固之功今遭

明主亦何憂哉衍日記有之人有挑其隣人之妻者
挑其長者長者詈之挑其少者少者報之後其夫死
而取其長者或謂之曰夫非罵爾者耶夫在人欲其
報我在我欲其罵人也夫天命難知人道易守守道
之臣何患死亡衍後爲曲陽令

仇覽字季智陳留考城人也入太學時諸生同郡符
融有高名與覽比字賓客盈室覽嘗自守不與融言
融觀其容止心獨竒之乃謂曰與先生同郡壤鄰房
牖今京師英雄四集志士交結之秋雖務經學守之
何固覽乃正色曰天子修設太學豈但使人游談其

中高揖而去不復與言後融以告郭林宗因與融齋
刺就房謁宿林宗嗟嘆下牀為拜覽初為本縣主簿
後歸鄉里卒

揚賜嘗退居隱約不答州郡禮命後辟大將軍梁冀
府非其好也出除陳倉令因病不行公車徵不至連
辭三公之命後拜尚書令數日出為廷尉賜自以代
非家法言曰三后成功惟殷于民臯陶不與焉蓋吝

心也尚書曰伯夷降典折人惟刑禹平水土主名山
川稷降播種農殖嘉穀三后成功殷於人言臯

陶不預其數者蓋恥之遂固辭以特進就第

魏邴原自遼東歸曹公辟為司空掾原女早亡時太

祖愛子蒼舒亦沒太祖欲求合葬原辭曰合葬非禮
也原之所以自容於明公公之所以待原者以能守
訓典而不易也若聰明公之命則是凡庸也明公焉
以為哉太祖乃止魏太子為五官中郎將天下向慕
賓容如歸而原獨守道持嘗自非公事不妄舉動太
祖徵使人從容問之原曰吾聞國危不事冢宰君老
不奉世子此典制也於是乃轉五官長史
晉庾敳字子嵩為吏部郎是時天下多故機變屢起
敳嘗靜默無為

陳袁樞字踐言家世顯貴資產充足而樞獨居處率

素傍無交往端坐入室非公事未嘗出遊榮利之懷
 淡如也王僧辯平侯景鎮京城衣冠爭往造請樞獨
 杜門靜居不求聞達後為丹陽尹下及當時朝賢並
 後魏胡方而為中書侍郎司徒崔浩及當時朝賢並
 愛重之清貧守道以壽終昔崔模字叔軌長者篤厚不營榮利頗為崔浩輕侮而
 守志確然不為浩屈後位至征東將軍後北齊盧熙裕襲兄爵為固安伯虛淡守道有古人之
 風為親表所敬重後後周于謹字思敬河南雒陽人性沉深有識量略窺

經史尤好孫子兵書屏居閭里未有仕進之志或
 之者謹曰州郡之職昔人所鄙台閣之位須待時來
 吾所以優游鄉邑聊以卒歲耳太宰元天穆見之嘆
 曰王佐才也後為太傅大宗伯

隋房彥謙為司隸刺史時隋政漸亂朝廷靡然莫不
 變節彥謙直道守嘗介然孤立為執政者之所嫉出
 為涇陽令

李禮成字孝諧年七歲與姑之子蘭陵太守榮陽鄭
 顥隨魏武帝入關顥母每謂所親曰此兒平生未嘗
 回頭當為重器耳及長深有行簡不妄通賓客釋褐



著作郎周受禪拜平東將軍散騎嘗侍于時貴公子
皆競習弓馬被服多爲軍容禮成雖善騎射而從容
儒服不失素望
裴矩煬帝時爲右光祿大夫于時皇綱不振人皆變
節左翊衛大將軍宇文述內史侍郎虞世基等用事
文武多以賄聞唯矩守嘗無賊穢之響以是爲世所
傳

李文博爲薛道衡所奏爲司隸從事于時朝政浸壞
人多藏賄唯文博不改其操論者以此貴之遭離亂
播遷不知所終

唐虞世南於隋大業初累授祕書郎遷起居舍人時
兄世基當朝貴盛妻子被服擬於王者世南雖同居
而躬履勤儉不失素業

竇威字文尉扶風平陵人隋太傅熾之子也沉深有
器局博覽羣言多所通涉家風尚武諸兄並以武功
致位通顯皆晒威所爲而終不改也隋內史令李德
林舉其有文學釋褐祕書郎

趙宗儒自中書侍郎平章事罷授右庶子退居守道
奉朝請而已德宗聞而嘉之遷吏部侍郎召見勞之
曰知卿閒六年故有此拜曩者與先臣並命尚念之

耶因俯伏流涕
廬紹廣明初遷給事中大寇犯邊避地江左雖生計
屢空而端默自守未嘗以事干侯伯人所難者紹力
行之

後唐李愚昭宗在鳳翔汴軍攻蒲華愚避難東歸雒
陽時衛公李德裕孫道古在平泉舊墅愚往依焉子
弟親採薪負薪以給朝夕未嘗于人

知足

夫知足不辱知止不殆老氏之訓也故大雅明哲之
士乃能察盈虛之理蹈卑約之戒使其任不踰量

嘗遠禍克保身吉而終無祗悔焉至乃辭婚當途移
疾避位用清白為家法故不益田廬謂贏餘為自苦
故不瀆富貴逮乎妨賢竊祿之媿發於話言懷田述
志之樂形於賦詠斯皆寃易象知退之旨識天道概
滿之意寡欲易足不忤不求內全節而無苟世聞風
而競勸其淑人之令範歟

漢張良封留侯為太子少傅良言天下事甚衆乃稱
曰家世相韓及韓滅不愛萬金之資為韓報仇彊秦
天下震動今以三寸舌為帝者師封萬戶位列侯此
布衣之極於良足矣願弃人間事欲從赤松子游耳

赤松子
仙人也

劉德為宗正嘗持老子知足之計妻死大將軍光欲以女妻之德不娶畏盛蒲焉

踈廣宣帝時為太傅廣兄子受為少傅在位五歲皇太子年十二通論語孝經廣謂受曰吾聞知足不辱知止不殆功遂身退天之道也今仕宦至二千石宦成名立不去懼有後悔豈如父子相隨出關歸老故鄉以壽命終不亦善乎受叩頭曰從大人議即日父子俱移病移病謂移書言病也蒲三月賜告廣遂稱篤上疏乞骸骨宣帝以其年老皆許之詔賜黃金二十斤皇太

子贈五十斤踈廣踈受既歸鄉里日令家共具設酒

食日日設之也諸族人故舊賓客相娛樂數問其家

金餘尚有幾所趨賣以共具幾所猶言幾許也趣讀日足居歲餘

廣子孫竊謂其昆弟老人廣所愛信者日子孫幾及

君時頗立產業基地幾讀日與今日飲食費且盡宜從丈

人所勸說君買田宅丈人嚴莊之稱也故親而老者皆稱焉老人即以

閒暇迺為廣言此計廣曰吾豈老諄不念子孫哉諄詩感

也音布顧自有舊田廬顧思念也令子孫勤力其中足以

共食與凡人齊今復增益之以為贏餘但教子孫怠

惰耳賢而多財則損其志愚而多財則益其過且夫

富者衆之怨也吾既無以教化子孫不欲益其過而生怨又此金者聖主所以惠養老臣也故樂與鄉黨宗族共饗其賜以盡吾餘日不亦可乎於是族人說服

說讀 日悅皆以壽終

郝曼容養志自修爲官不肯過六百石輒自免去

後漢馬援爲伏波將軍封新息侯食邑三千戶援乃擊牛醢酒勞享軍士

醢猶滷也 音所宜反從容謂官屬曰吾從弟少游嘗哀吾慷慨多大志曰士生一世但取衣食

裁足乘下澤車

車行澤者 欲短載御欵段馬

欵猶緩也言 形段遲緩爲郡掾吏守墳墓鄉里稱善人斯可矣致求盈餘但自

苦耳當吾在浪泊西里間虜未滅之時下潦上霧毒

氣重蒸仰視飛鳶跼跼墮水中

鳶鴟也跼跼貌 音都瑛秦瑛二切卧念少游平生時語何可得也今賴士大夫之力被

蒙大恩猥先諸君紆佩金紫且喜且慙吏士皆伏稱

萬歲及軍還將至故人多迎勞之平陵人孟翼各有

計謀於坐賀援謂之曰吾望子有善言反同衆人

邪昔伏波將軍路博德開置七郡裁封數百戶今我

微勞猥享大縣功薄賞厚何以能嘗久乎先生奚用

相濟翼曰愚不及

張霸爲會稽太守視事三年謂掾吏曰太守起自孤



知是
卷之七

生致位郡守盖日終則移月滿則虧老氏有言知止不辱遂止病

魏程昱為奮武將軍從太祖屢立功及天下漸平昱宗人奉牛酒大會昱曰知足不辱吾可以退矣乃自表歸兵闔門不出
晉羊祜為征南大將軍開府儀同三司嘗與弟琇書曰既定邊事當角巾東路歸故里為容棺之墟以白士而居重位何能不以盛滿受責乎踈廣是吾師也南齊王秀之為晉平太守至郡暮年謂人曰此郡豐壤祿俸嘗充吾山資已足豈可久留以妨賢路上請

代時人謂王晉平恐富求歸

丘靈鞠為尚書左丞世祖卽位轉通直嘗侍領東觀祭酒靈鞠曰久居官願數遷使我終身為祭酒不恨也

梁陶季直初仕齊為尚書左丞遷建安太守為政清靜百姓便之梁臺建為給事黃門侍郎嘗稱仕至二千石始願畢矣無為久預人間事

江淹為散騎嘗侍左衛將軍嘗謂子弟曰吾本寒素不求貴富今之忝竊遂至於此平生言止足之事亦以備矣人生樂耳須富貴何時吾功名既立正欲歸



身草萊耳

陳虞寄字次安官至戎昭將軍太中大夫卒前後所
居官未嘗至秩滿裁養年數月便自求解退嘗曰知
足不辱吾知足矣

後魏裴宣爲益州刺史家世以儒學爲業嘗慕廉退
每嘆曰以賈誼之才仕漢文之世不歷公卿將非運
也乃謂親賓曰吾本閭閻之士素無當世之志直隨
牒推移遂至於此祿厚養親效不光國瞻言往昔可
以言歸矣因奉表求解世宗不許乃作懷田賦以叙
心焉

北齊鄭述祖文宣天保初累遷太子少師儀同三司
兖州刺史病篤乃自言之且曰吾今老矣一生富貴
足矣以清白之名遺子孫死無所恨遂卒於州
後周蕭大圖梁簡文帝子也國亡於周爲麟趾殿學
士大圖深信因果心安閒於嘗言之曰拂衣褰裳無
吞舟之漏網挂符懸節慮我志之未從儻獲展禽之
免有美慈明之進如蒙北叟之放實勝濟南之徵其
故何哉夫閭閻者有優游之美朝廷者有簪珮之累
蓋繇來久矣留侯追蹤於松子陶朱成術於辛文良
有以焉况乎智不逸羣行不高物而欲辛苦一生何

其僻也豈如知止蕭然無累北山之北弃絕人間南山之南超踰世網面川原而帶流水倚郊甸而抗平臯築蝸舍於疎林構環堵於幽薄近瞻煙霧遠睇風雲藉纖草以蔭長松結幽蘭而援芳桂仰翔禽於百仞俯泳魚於千尋果園在後開窓牖以臨花卉蔬圃居前坐簷楹而看灌叻二頃以供饘粥十畝以給絲麻侍兒五三可充絀織家僮數四足代耕耘沽酪牧羊協潘生之志畜雞種黍應莊叟之言穫菽尋汜氏之書露葵微尹君之錄烹羔豚而分春酒迎伏臘而候歲時披良書採至願歌纂纂唱烏烏可以娛神可

以散慮有朋自遠揚摧古今田峻近至劇談稼穡斯亦足矣樂不可支求保性命何畏憂責豈若蹙足入絆申頸就羈遊帝王之門趨宰衡之勢不慮飄塵之少選寧覺年祀之斯須萬物營營靡存其意天道昧昧安可問哉嗟乎人生若游雲朝露俟長繩繫景實所願言執燭夜游驚其迅速耳百年何幾擊忌曲拳四時如流俛眉躡足出處無成語默奚當非直丘明所恥抑亦宣臣恥之

隋梁睿字恃德初仕後周爲柱國益州總管高祖受禪自以周代舊臣久居重鎮內不自安屢請入朝於

是徵還京師及引見帝爲之與命睿上殿握手極懽
睿退謂所親曰功遂身退今其時也遂謝病闔門自
守不友當時

韋世康以高祖開皇初爲絳州刺史性恬素好古不
以得喪干懷在州嘗慨然有正足之志與子弟書曰
吾生因緒餘夙霜纓弁驅馳不已四紀於茲亟登袞
命頻蒞方岳志除三感心慎四知以不貪而爲寶處
脂膏而莫潤如斯之事頗爲時悉今耄雖未及壯年
已謝霜早梧椒風先蒲柳眼闇更劇不見細書足疾
彌增非可趨走祿豈湏多防蒲則退年不待暮有疾

便辭况孿春秋已高溫清宜奉晨昏有關罪在我躬
今世穆世文並從戎役吾與世冲復嬰遠任陟岵瞻
望此情彌切桓山之悲倍深嘗戀意欲上聞乞終養
禮未訪汝等故遣此及興言遠慕感咽難勝弟報以
事恐難遂於是遂止
于宣敏爲奉車都尉嘗以蒲盛之誠昔賢所重每懷
靜退著述志賦以見其志焉
唐岑本文字景仁爲中書令有勸其營產業者文本
歎曰南方一布衣徒步入關疇昔之望不過祕書郎
一縣令耳而無汗馬之勞徒以文墨致位中書令斯

亦極矣荷俸祿之重為懷已多何得更言產業乎言者人息而退
 李日知以玄宗先天元年轉刑部尚書罷知政事頻請致仕許之初日知將有陳請而不與妻謀歸家而使左右飭裝將出居別業妻驚曰家產屢空子弟各官未正何為遽解也日知曰書生至此已過本分人情無厭若恣其心是無止足之日及歸田園不事產業但緝構池亭多引後進與之談宴

册府元龜

册府元龜

淮南李嗣京參閱

西極文翔鳳訂正

豫章黃國琦較釋

總錄部 三十六

傳學 多能

傳學

夫學知乎不足廣業在勤友貴乎多聞孤陋為耻蓋夫自強不息之士以好古博雅為念泛覽篇籍之圃索隱天人之際以至九流七略之奧諸子百家之言

龜策曆象之精微方伎術數之玄妙史書蟲篆之叢
勝聲樂鍾律之鏗鏘建乎地理山經玄文釋典咸能
探其幽贖洞乎指趣始繇時習之利終成待問之名
群居之言必及於義專問之學自可名家仲尼所謂
好古敏以求之者乃斯人之謂矣

漢司馬談學天官書於唐都郎律歷所受易於楊何

何字習道論於黃子景帝時人仕於建元元封之間

愍學者不達其意而詩諄諄或也為習所乃論六家

之要指六家謂陰陽儒位至太史公

司馬遷字子長其涉獵者廣博貫穿經傳馳騁古今

上下數十載間位至太史

李尋治尚書與張儒鄭寬中同師寬中等守師法教

授尋獨好洪範灾異又學天文月令陰陽位至騎都

尉

冀奉字少君博學不倦好律歷陰陽之占位至諫大

夫

翟方進雖受穀梁然好左氏傳天文星歷其左氏則

國師劉歆星歷則長安令田終術師也言劉歆及田

受學於位至丞相

揚雄字子雲少好學不為章句訓詁通而已詁謂

指也傳

覽無所不見而潭思渾天

潭深也渾天象也

參摹而四分之

三折而四分天之宿度甲乙也

極於八十一旁則三摹九据

据位也處也

極之七百二十九贊亦自然之道也位至大夫

後漢王景少學易遂廣闢衆書又好天文術數之事

沈深多伎藝位至廬江太守

班固字孟堅年九歲能屬文誦詩賦及長遂博貫載

籍九流百家之言無不研究

九流謂道儒墨名法陰陽雜縱橫

所學

無嘗師不爲章句大義而已位至大將軍中護軍

崔駰能通詩易春秋博學有偉才盡通古今訓詁百

家之言善屬文少游太學與班固傅毅同師齊名位

至長岑長

徐淑寬裕博雅好學樂道隨父愼在京師鑽孟氏易

春秋公羊禮記周官善誦太公六韜位至度遼將軍

劉寬少學歐陽尚書京氏易尤明韓詩外傳星官風

肉筭曆皆究極師法稱爲通儒未嘗與人爭勢利之

事後爲太尉

梁鴻扶風平陵人也受業太學家貧而尚節介博覽

無不通而不爲章句

翟酺四世傳詩酺好老子尤善圖緯天文內曆筭位

至將作大匠

胡廣有雅才學究五經古今術藝皆畢覽之位至太

傅
蔡邕少博學師事太傅胡廣好辭章術數天文位至
左中郎將

延篤從馬融受業博通經傳及百家之言能著文章
有名京師位至京兆尹

劉洪篤信好學觀乎六藝群書意以為天文數術探
賸索隱鈎深致遠遂專心銳思

唐檀少遊太學習京氏易韓詩顏氏春秋尤好災異
星占位至郎中

任安字定祖少遊太學受孟氏易兼通數經又從同

郡揚厚學圖識究極其術時人稱曰欲知仲桓問任
安又曰居今行古任定祖安初仕州郡後徵辟皆不

就
法真南郡太守雄之子好學而無嘗家博通內外圖

典為關西大儒辟公府舉賢良皆不就
公沙穆習韓詩公羊春秋尤銳思河雒推步之術位

至遼東屬國都尉
樊志張漢中南鄭人也博學多通隱身不仕

韓說博通五經尤善圖緯之學仕至江夏太守



樊英少受業三輔習京氏易兼明五經又善風角星

筭河雒七緯推步災異 七緯者易緯稽覽圖乾鑿度坤靈圖通卦驗是類謀辨終

俗也書緯璇璣玲考靈齋刑德攷帝命驗運期受也詩緯推度災記曆書含神務也禮緯含文嘉稽命俊

斗威儀也樂緯動嚴儀稽耀嘉汁圖徵也考經緯援神兵符命决也春秋緯演孔圖元命苞文耀鉤運斗

樞感精符握誠圖考異郵保乾圖漢台孝佑助期握誠圖潛潭巴詵題辭 位至光祿大夫

申屠蟠陳留外黃人也隱居精學博貫五經兼明圖

緯後以博士徵不至

徐雅少為諸生學嚴氏春秋京氏易歐尚書兼綜風

角星官筭曆河圖七緯推步四察孝廉五辟罕府三

舉茂才

李固改易姓名杖策驅騾負笈追師三輔學五經積

十餘年博覽古今明于風角星筭河圖識緯仰察俯

占窮神知變位至太尉

賀純字仲真會稽山陰人少為書生博極群藝徵拜

議郎數陳災異上便宜數百事多見省納遷江夏太

守

周昕字大明少游京師事太傅陳蕃博覽群書明于

風角善推災異

鄭玄少為鄉嗇夫得體歸嘗詣學官不樂為史父數

怒之不能禁遂造太學受業師事京兆第五元先造

冊府元龜 總錄部 卷之三百八十六 五

通京氏易公羊春秋三統曆九章美術徵大司農不

就 應劭字仲遠博學多識尤好事諸所撰述風俗通等

尉

凡百餘篇辭雖不雅世服其博聞位至袁紹軍謀較

魏樂詳字文載學左氏傳又善推步三五別高貴卿

公時授詔與太史典定律曆太守杜畿亦甚好學署

詳文學祭酒

蜀孟光字孝裕博物識古無書不覽尤銳意三史長

於漢家舊典位至大司農

李謨字欽仲五經諸子無不覽該位至右中郎將

譙畊字榮始巴西克國人也治尚書兼通諸經及圖

緯州郡辟請皆不應

譙周畊子也周字允南研精六經尤善書札頗曉天

文潛識內敏為益州典學從事總州之學者後入晉

拜騎都尉

吳陸續字公紀容貌雄壯博學多識星曆筭數無不

該覽位至偏將軍

王蕃字永元博覽多聞兼通術藝

侍王蕃黃中通

位至散騎中嘗侍

蕃為後主所誅丞相陸凱上疏日嘗

晉鄭冲覽博究儒術及百家之言仕魏為司徒時文帝輔政命賈克羊祐等分定禮儀律令皆先諮于冲然後施用

張華學業優博辭藻温麗宏瞻多通圖緯方伎之書莫不詳覽位至司空

虞喜字仲寧會稽餘姚人博學好古專心經傳兼覽識緯乃著安天論以難渾盖以散騎嘗侍微不起

劉殷弱冠時博通經史綜核群言文章詩賦靡不該覽位至新興太守

索靖該博經史兼通內緯位至遊擊將軍


索統字叔徹燉煌人游京師受業太學博綜經籍遂為通儒明陰陽天文善術數占候仕至郎中

黃沈魏郡丘人泓之父也善天文秘術泓從父受業精妙踰深兼博覽經史尤明禮易性忠勤非禮不動

邵續字嗣祖朴素有志烈博覽經史善談理義妙解天文仕至沁水令

杜夷字行齊博覽經籍百家之書筭圖曆緯靡不畢究位至國子祭酒

范平字子安研覽墳索遍該百氏姚信賀邵之徒皆從受業位至臨海太守



鮑靚字太玄學兼內外明天文河雒書

宋徐廣字野民世家好學至廣尤精百家數術無不研覽後為秘書監性好讀書老猶不倦答禮問百餘條用於今世仕至中散大夫

梁顧協博極群書於文字及禽獸草木尤稱精詳位至員外散騎嘗侍

庾承先穎川鄆陵人也弱歲受學於南陽劉虬強記成識出於群輩玄經釋典靡不該悉九流七略咸所正練不就徵辟隱居而終

不誦字彥寶新野人也幼聰警篤學經史百家無不

該綜緯候書射並一時之絕初高祖起義署為西府記室參軍

羊侃字祖忻雅愛文章博涉書記尤耽左氏春秋及孫吳兵法

徐擒為皇太子家令兼掌管記高祖問五經大義次問歷代史及百家雜說末論釋教搗商較縱橫應答如響高祖甚嘉歎異

陳顧野王幼學七歲讀五經知大旨長而遍觀經史精記默識天文地理著龜古候蟲篆奇字無所不通位至光祿卿

馬樞傳極經史尤善佛經及周易老子義文帝徵為
度支尚書不應命

顧越字允南勵精學業不捨晝夜至於微言玄旨九
章七曜音律圖緯盡其精微歷北海安西湘東王府
參軍及武帝撰制旨新義選諸儒在所流通遣越還
吳敷揚講義越遍該經藝浮明毛詩傍通異義特善
莊老尤長論難求至太中大夫

孔奐數歲而孤為叔父虞孫所養好學善屬文經史
百家莫不通涉沛國鄧顯時稱學府每共奐討論深
相歎乃執奐手曰昔伯喈墳素悉付仲宣吾當希蔡

君足下無愧王氏所保書籍尋以相付位至弘範官
衛尉卿

周確字士潛美容儀寬大有行簡傳涉經史篤好玄
言位至都官尚書

徐孝克凌之第三弟也少為周易有口辯能談玄理
既長遍通五經博覽史籍後入隋為國子博士

後魏燕鳳字子章代人少好學博綜經史明習陰陽
識緯位至鎮遠將軍

高謙之少以老聞及長屏絕人事專意經史天文筭
曆圖緯之書多所該涉好文章留意老易位至國子



博士

崔浩字伯淵清河人也白長公玄伯之長子少好文
學博覽經史玄象陰陽百家之言無不關綜研精理
義時人莫及之位至侍中撫軍大將左光祿大夫
高允縛通經史天文術數尤好春秋公羊位至光祿
大夫

高祐博涉經史好文字雜說位至光祿大夫

孫紹字世慶少好學通涉經史頗有文才陰陽術數
多所貫涉位至左衛將軍右光祿大夫

李業興上黨長子人博涉百家圖緯風角天文占候

無不討練丈長筭曆獨守閒一講肄經典二十餘年

時人號爲儒林先生後爲齊文襄王中外府諮議參
軍

信都芳好學善天文筭數甚爲安豐王延明所知延
明家有群書欲抄集五經筭事爲五經宗及古今樂
事爲樂書又取渾天歌噐地動銅鳥漏刻候風諸圖
爲噐準並令芳筭之會延明南奔芳乃自撰注位中
外府田曹參軍

劉芳爲太子庶子芳才思深敏特精經義博聞強記
兼覽蒼雅尤長音訓辨所無疑於是禮遇日隆賞賚

豐渥

嘗爽字仕明河內人好學博聞強記明習候緯五經
百家多所研綜州郡禮命皆不就性好墳籍鳩集不
口手自補治躬加題帖其家所有垂將萬卷覽讀不
息多有異聞諸儒服其淵博至於學術精微當時莫
及後爲宣威將軍

北齊權會字正理河間人也志尚沉雅動遵禮則少
受鄭易探賸索隱妙盡幽微詩書三禮文義詠洽兼
明風角妙識玄象位至國子博士

後周沈重字德厚吳興武康人學業該博爲當世儒

宗至於陰陽圖緯道經釋典靡不畢綜位至太嘗鄉
柳敏字白澤性好學涉獵經史陰陽卜筮之術靡不

習焉

盧光字景仁性溫謹博覽群經精於三禮善陰陽解
鍾律又好玄言位至陝州總管府長史

樊深既專經又讀諸史及蒼雅篆籀陰陽卜筮之書
位至露門學博士下大夫

隋李德林幼聰敏該博墳典陰陽候緯無不通涉後
至懷州刺史

明克讓字弘道少儒雅善談論博涉書史所覽將萬

卷三禮禮論尤所精研龜筮曆象咸得其要位至通
直散騎嘗侍

房暉遠字崇儒恒山真定人也世傳儒學暉遠幼有
志治三禮春秋三傳詩書周易兼善圖緯位至國子
博士

韋鼎字起盛少通脫博涉經史明陰陽逆刺尤善相
術位至光州刺史

王頰性識甄明精力不倦好讀諸子偏記異書當代
稱為博物為漢王諒府諮議叅軍

潘徽字伯彥吳郡人也性聰敏少受禮於鄭灼受毛

詩於施公受書於張冲講莊老於張機並通大義尤
精三史仕至西海郡威定縣主簿

劉焯以儒學知名專以教授著述為務孜孜不倦買
馬王鄭所傳章句多所是是非九章算術周髀七曜曆
嘗十餘部推步日月之經量度山海之術莫不覈其
根本窮其秘奧著稽極十卷曆書十卷五經述議並
行於世位至太學博士

劉炫少以聰敏見稱與王劭同脩國史俄直門下省
兼直內省考定群言炫雖遍直三省竟不得官為縣
司責賦役炫自陳於內史送詣吏部尚書韋世康問

丹陽元... 博學

其所能炫自為狀曰周禮禮記毛詩尚書公羊左傳
孝經論語孔鄭王何服杜等注凡十三家雖義有精
粗並堪講授周易儀禮穀梁用功差少史子文集嘉
言美事咸誦於心天文律曆窮竅微妙至於公私文
翰未嘗假于吏部竟不詳試然在朝知名之士十餘
人保明炫所陳不謬於是拜殿內將軍

盧太翼河間人也閑居味道不求榮利博綜群書爰
及佛道皆得其精微尤善占候筭曆之術初隱於白
鹿山後卒於雒陽
王真字仲逸梁郡陳留人少聰敏好學善毛詩禮記

左傳周易諸史百家無不畢覽後不舉秀才授縣尉
卒

馬光字榮伯武安人少好學從師數十人晝夜不息
圖書識緯莫不畢覽尤明三禮為儒者所宗位至太
學博士

唐孔穎遠初以教授為務尤明服氏傳鄭氏尚書王
氏易毛詩禮記兼善筭曆博究群言解屬文頗習政
事位至國子祭酒

薛登博涉文史每與人談論前代故事必廣引證驗
有如指掌位至泉州刺史



丹州元氣傳學
卷之七十一

揚縮生而聰惠其長好學不倦博通經史九流七略諸子諸集無不該覽位至中書侍郎平章事

徐岱蘇州嘉興人少好學六籍諸子悉所探究位至給事中

王起自幼及耄手不釋卷天下之書無不該覽文宗曾私撰數字以示之起曰臣書中所不識者唯入駮圖中三五字而已今此字臣未知出於何書文宗笑而奇之故待之如師友自曰當代仲尼位至山南東道節度使

多能

昔夫子以將聖之姿擅多能之譽蓋夫經藝之富數術之廣專之者易而兼之者難君子所不求備於人者良有旨也其有捭洽聞彊識之美稟聰明博達之智周覽圖傳兼通衆技至於觀天之象察地之理精和鵠之鍼石辨夔牙之鍾呂極研桑之心計曉孫吳之兵法及至圖畫卜筮篆籀草隸擊劍盤礴投壺奕碁或才至兼人或品稱第一雖曰小道必有可觀借云異端豈有所害自非英偉茂異亦曷能臻此焉商瞿孔子弟子年長無子其母為取室孔子使之齊瞿母請之孔子曰無憂瞿言四十後當有五丈夫子

冊府元龜 總錄部 卷之三百八十六 十四

五男 已而果然

漢司馬相如少時好讀書學擊劍擊劍者以劍搖擊而中之非斬刺也

為文園令

劉向本名更生以父德任為輦郎擢為諫大夫宣帝持更生以通達能屬文獻賦頌凡數十篇帝復興神僊方術之事而淮南有枕中鴻寶苑秘書書言神仙使鬼物為金之術及鄒衍重道延命方世人莫見而更生父德武帝時治淮南獄得其書更生幼而讀誦以為奇獻之言黃金可成帝令典尚方鑄作馮奉世昭帝時為武安長學春秋涉大義讀兵法

後漢馬嚴妙擊劍習騎射後從平原楊太伯講學直心墳典能通春秋左氏仕郡督郵

桓譚父成帝時為太樂令譚以父任為郎因好音律善鼓琴博學多通徧習五經皆訓詁大義不為章句蔡邕少博學好辭章數術天文妙操音律官至左中郎將

馬融高才博洽為世通儒又善鼓琴好吹笛桓帝時為南郡太守

楊球能擊劍習弓馬性嚴厲好申韓之學後為都尉酈炎字文勝范陽人有文才解音律州郡辟命皆不

多能
卷之七十一

就

皇甫嵩少有文武志介好詩書習弓馬後至太尉

魏王弼性和理樂遊晏解音律善投壺為尚書郎

蜀諸葛亮性長於巧思損益連弩木牛流馬皆出其

意推演兵法作八陣圖咸得其要位至丞相

譙周字允南研精六經尤善書札頗曉天文後為光

祿大夫魏封陽城亭侯

李仁字德賢博學伎藝算術卜數醫藥弓弩機械之

巧皆致思焉為州書佐尚書令史

吳王蕃字永元博覽多聞兼通術藝為散騎嘗侍

沈文字子正吳郡人羽冠博學多所貫綜善屬文體

兼好武事注孫子兵法又辯於口每所至眾人皆默

然莫與為對咸言其筆之妙舌之妙刀之妙三者皆

過絕於人

晉傅玄少孤貧博學善屬文解鍾律後至司隸較尉

阮籍字嗣宗博覽群籍尤好莊老嗜酒能嘯善彈琴

為步兵較尉

嵇康學不師受博覽無不該通好老莊彈琴詠詩自

是於懷拜中散大夫

王廣字世將少能屬文多所通涉工書畫善音樂射

御博奕雜伎後爲平南軍護南蠻較尉荊州刺史
郭璞好古文奇字妙於陰陽筭曆爲著作佐郎
王裒字偉元城陽營陵人也氣辭雅正博學多能隱
居教授三徵七辟皆不就
索襲字備祖燉煌人也虛辭好學不應州郡之命舉
孝廉賢良皆以疾辭游思於陰陽之術著天文地理
十餘篇多所啓發
戴逵字安道譙國人也少博學好談論善屬文能鼓
琴工書畫其餘巧藝靡不畢綜後以太學博士散騎
侍郎給事中徵不起

前秦王陞字安生博學有雄才明天文圖緯爲苻洪
司馬

宋王懿字仲德少沉審有意略通陰陽辭聲律爲鎮
北將軍

劉敬宣字萬壽多伎藝弓馬音律無事不善爲左衛
將軍散騎管侍

張永涉獵書史能爲文章善隸書曉音律騎射雜藝
觸類兼善又有巧思益爲太祖所知紙及墨皆自營
造帝每得永表格輒執玩咨嗟自歎供御者了不也
也仕至吏部尚書

孔琳之疆正有志力好文義解音律能彈碁妙善草
隸為祠部尚書

王徽字景玄瑯琊臨沂人少好學無不通覽善屬文
能書畫兼解音律醫方陰陽術數官至中書侍郎
沈勃好為章善彈琴能圍碁為給事中

范曄少好學博涉經史善為文章能隸書曉音律為
左衛將軍太子詹事

劉休為桂陽王征北叅軍明帝頗有好尚尤嗜飲食
休多藝能爰及鼎味問無不解

蕭思話涉獵書傳頗能隸書解音律便弓馬為侍中

領前將軍

江湛愛好文義善彈碁鼓琴兼明算術為吏部尚書
南齊祖冲之解鍾律博塞當時獨絕莫能對者為長
水較尉

柳世隆少立功名晚專以談義自業善彈琴世稱柳
公雙璫為士品第一嘗自云馬箭第一清談第二彈
琴第三為侍中衛將軍

杜栖吳郡錢塘人少從儒士劉瓛受學善清談能彈
琴飲酒與父京產共隱居不仕

梁庾詵字彥實新野人也幼聰警篤學經史百家無

不該綜緯侯書射棊筭機巧並一時之絕湘東王召
爲鍾西記室不就又徵中書侍郎不起

陶弘景字淵明丹陽秣陵人爲奉朝請諸王侍讀讀
書萬餘卷善琴棊工草隸又性好著述尚奇異顧惜
光景老而彌篤尤明陰陽五行風角星筭山川地理
方圖產物醫術本草著帝王年曆又嘗造渾天象云
脩道所須非止史官是用

張孝秀爲建安王別駕博涉群書精釋典善談論工
隸書凡諸藝能莫不明習

朱异既長涉獵文史兼通雜藝博奕書算皆其所長

年二十詣都尚書令庾約面試之曰戲弄曰卿年少
何乃不廉异遂巡未達其旨乃曰天下唯有文義棊
書卿一時將去可謂不廉也後爲中領軍

柳惲好學善尺牘學彈琴特窮其妙又工篇什及品
定棊譜登格者二百七十八人第其優劣爲棊品三
卷惲爲第二焉帝謂周舍曰吾聞君子不可求備至
如柳惲可謂具美分其才藝足了十人惲著卜枝龜
經性好醫術盡其精妙爲吳興太守

江祿幼篤學有文章工書善琴爲廬陵威王續驃騎
諮議參軍

柳惔好學工製文尤曉音律爲南安將軍湘州刺史
蕭駿善草隸工文章晚更習武膂力絕人與永安侯
確其類爲超武將軍封南安侯

陳蔡凝幼聰悟美容止飢長博涉經傳有文詞尤工
草隸爲黃門侍郎

陳禹聰敏有識量涉獵經史解風角兵書頗厲文便
騎射官至五府諮議

孫瑒少儻好謀略博涉經史尤便書翰爲五兵尚
書

吳明徹微涉書史經傳就汝南周弘正學天文孤虛

遁甲略通其妙官至南交州刺史

侯安都工隸書能鼓琴涉獵書史爲五言詩亦頗清
靡兼善騎射爲邑里雄豪後爲征南大將軍江州刺

史
後魏古弼少忠謹好讀書又善騎射官至尚書令

李同軌學綜諸經多所治誦兼讀釋氏又好醫術官
至通直散騎嘗侍

裴詢字敬叔美儀貌多藝能音律博奕咸所開解起
家奉朝請

劉懋聰敏好學博綜經史善草隸書多識奇字爲輕

多能 卷之七百八十六

車將軍 崔巨倫字孝宗幼孤及長涉獵經史有文章武藝仕
光祿大夫 王繇字茂道好學有文才尤善草隸又工摹畫為時
人所服仕至尚書郎 裴敬憲工草隸解音律為太學博士
北齊李元忠粗覽史書及陰陽術數解鼓箏兼好射
彈有巧思又善於方技官至侍中 李儻字德沉少聰敏有才藝音律博奕之屬多所通
解為尚書儀曹郎

祖瑛字孝徵天性聰明事無難學凡諸技藝莫不措
懷文章之外又善音律解四夷語及陰陽占候醫藥
之術尤是所長文宣雖嫌其數犯憲法而愛其才技
官至尚書左僕射

祖孝隱孝徵之弟也有文學早知名詞章雖不逮兄
亦機警有口辯兼解音律位至通直散騎嘗侍
祖君信孝徵之子也涉獵書史多諸雜藝位至散騎
嘗侍

後周唐令則瑾之子也次子令則性好篇章兼解音
律文多輕艷為時人所傳官至樂部下大夫



韓盛字文焮南陽堵陽人也幼有操行涉獵經史兼善騎射膂力過人仕至新平郡守

蕭撝善草隸名亞於王褒筭數醫方咸亦留意所著詩賦雜文數萬言頗行於世官至少傅封蔡陽公

隋王誼字宜君少有大志便弓馬博覽群言為大司徒子

令狐熙字長熙博覽群書尤明三禮善騎射頗知音律起家以通經為吏部上士

宇文愷少有器局諸兄並以弓馬自達愷讀好學博覽書記解文多伎藝為名公子累遷御正中大夫儀

同三司

鄭譯字正義頗有學識兼知鍾律善騎射為上柱國李敏幽州總管崇之子起家千牛美姿儀善騎射歌舞管弦無不通解為柱國

盧賁字子微略涉書記頗解鍾律為太子左庶子長孫熾字仲光性敏慧美姿儀頗涉群書兼長武藝為戶部尚書

長孫晟字季晟性通敏涉獵書史工彈善射矯勇過人仕至淮陽太守右驍騎將軍

楊素少與天水牛弘同游好學研精不倦多所通涉

丹元多能

卷之七百六

善屬文工草隸頗留意於風角爲司徒

陳政字弘道太僕卿茂之子少養官中美風儀有幹

局便弓馬解鍾律工文翰兼有口辯十七爲太子千

牛脩員

閻毗七歲襲封石保縣公及長好經史受漢書令蕭

該毗通大旨能篆書工草隸尤善畫爲當時之妙周

武帝見而悅之命尚清都公主入隋爲將作少監

唐竇璡性寬厚工書解鍾律兼有巧思歷潁川南郡

扶風太立

盧藏用善琴棊尤工篆隸爲尚書右丞

王維爲右丞有俊才博學多藝以詩名盛於開元天

寶間書畫特臻其妙筆蹤措思參於造化

韓滉爲右僕射平章事封晉國公滉尤工書善丹青

以繪事非悉務自晦其能未嘗傳之好易象及春秋

著春秋通例及天事序議各一卷

李勉爲太子太師善鼓琴好屬文詩妙知音律能自

制琴又有巧思

李臯爲江陵尹嘗運心巧思爲戰艦挾二輪蹈之翽

風鼓疾若掛帆席所造省易而久固又造敵器進入

內中

并符元道 總錄部

卷之七百六

二十三

册府元龜

多能

卷之七百八

歸登有文學工草隸為工部尚書

蕭祐開潛貞退善琴工書畫好五言詩嘗寄情於雲

林泉石之間故當時與之遊者皆名人清士卒為桂

州觀察使

後唐李巖幽州人本名讓坤仕燕為刺史涉獵書傳

便弓馬多曲藝以功名自許後為客省使

晉李從昶秦王茂貞之第三子也為左龍武統軍少

習華侈以逸遊燕樂為務而音律圖畫無不通之

册府元龜

册府元龜

淮南李嗣京參閱

西極文翔鳳訂正

豫章黃國琦較釋

想錄部

德行

德

苞五嘗之性冠四科之首在醜則為君子立教則為

人師者其唯德也歟故卷懷自守雖幽蒨而靡欺忠

信以行於蠻貊而何問其大也喻神靈之變化其達

册府元龜 總錄部

卷之七百八

也為朝野之規矩見之者既欣而且慕親之者不孤
 而有隣若乃就其浮居射為仁里讓之高位發於言
 歎屈王公而盡禮來州將之致恭其有當叔世遷訛
 暴亂橫起處廣澤而自若得衆力之全讓或惡子望
 風而引避或小人聞言而改操爭訟繇之取決禮讓
 為之興行豈辭小官自成德化長幼咸服薰灼彌廣
 雖復考終長逝義形嗟泣飾終之禮曲盡繇乘至有
 身輕鴻毛頭曠其死孟軻所謂以德服人者斯之謂
 歟

老子者苦楚縣厲鄉曲里人姓李名耳字伯陽周守

藏室之史也孔子適周將問禮於老子老子曰子所
 言者其人與骨已朽矣獨其言在耳且君子得其時
 則駕不得其時則蓬累而行吾聞之良賈深藏若虛
 君子盛德容貌若愚去子之驕氣與多欲態色與滯
 志是皆無益於子之身吾所以告子若是而已孔子
 去謂弟子曰鳥吾知其能飛魚吾知其能游獸吾知
 其能走走者可以為網游者可以為綸飛者可以為
 矰至於龍吾不能知其乘風雲而上天吾今日見老
 子其猶寵耶

孔子魯大夫也於鄉黨恂恂如也似不能言者

恂恂
温恭

之其在宗廟朝廷便便言為謹爾便便辯也雖朝與

下大夫言侃侃如也侃侃和樂之貌

顏回字子淵孔子弟子孔子曰自吾有回門人益親

回為孔子胥附之有能使門人日親曾子曰以能問於不能以多問於

寡有若無實若虛犯而不較較報也言見侵而不報昔者吾友

嘗從事於斯矣友謂顏淵

漢嚴尊字君平蜀人卜筮於成都市以為卜筮者賤

業而可以惠人有邪惡非正之問則依蓍龜為言於

害與人子言依於孝與人弟言依於順與人臣言依

於忠焉因執道之以善從吾言者已過半矣揚雄少

時從游學已而仕京師顯名數為朝廷在位賢者稱

君平德季強為益州牧喜謂揚雄曰吾真得嚴君平矣及至蜀改禮與相見卒不敢言以為從事

後漢卓茂南陽宛人性寬仁恭愛鄉黨故舊雖行能

與茂不同皆愛慕欣欣焉後終於太傅

周黨字伯况太原廣武人勅身脩志州里稱其高行

王莽竊位託疾杜門自後賊暴縱橫殘滅郡縣唯至

廣武過城不入建武中徵為議郎以病去職

荀恁太原廣武人隱居山澤以求厥志王莽末匈奴

寇其本縣廣武聞恁名節相約不入荀氏閭

夏恭梁國蒙人王莽末盜賊縱橫攻沒郡縣恭以恩

信爲衆所附擁兵固守獨獲安全光武卽位召拜郎中遷太山都尉

樊宏南陽湖陽人王莽末與宗家親屬作營塹自守老弱歸之者千餘家時赤眉賊掠唐子鄉多所殘殺欲前攻宏營宏遣人持牛酒米穀勞子赤眉赤眉長老先聞宏仁厚皆稱曰樊君素善且今見待如此何心攻之引兵而去遂免寇難

逢萌字子康北海都昌人居瑯琊勞山養志脩道人皆化其德北海太守素聞其高遣吏奉謁致禮萌不答太守懷恨而使捕之吏叩頭曰子康大賢天下共

聞所在之處人敬如父往必不獲祇自毀辱太守怒收之繫獄更發他吏行至勞山人果相率以兵弩捍禦吏被傷流血奔而還

蔡衍汝南項人以禮讓化鄉里有爭訟者輒詣衍決之其所平處皆曰無怨

宗慈字孝初南陽安衆人爲脩武令棄官徵拜議郎未致道疾卒南陽郡士皆重其義行

孟嘗會稽上虞人爲合浦太守病自上被徵隱處窮澤身自耕傭隣縣士民慕其德就居止者百餘家

陳寔潁川人爲太丘長在鄉閭平心率物其有爭訟

輒求判正曉譬曲直退無怨者至及嘆曰寧為刑罰所加不為陳君所短寔卒大將軍何進遣使弔祭海內赴者三萬餘人制衰麻者以百數

司馬均字少賓安貧好學隱居教授不應辟命信誠行乎州里鄉人有所計爭輒令說賓不直者終無敢言

爰延字季平陳留外黃人為鄉嗇夫仁化本行人但聞嗇夫不知郡縣

鄭玄北海高密人自徐州還高密道遇黃巾賊數萬人見玄皆拜相約不敢入縣境後為大司農

任旒字子旗博昌人以至行稱黃巾賊起天下飢荒

人民相食寇到博昌聞旒姓字乃相謂曰宿聞任子旗天下賢人也今雖作賊那可入其鄉耶遂相帥而去

蘇是穀聞遠近

許劭字子將汝南平輿人為郡功曹太守徐瑒甚敬之府中聞子將為吏莫不改操飾行同郡袁紹公族

豪俠去濮陽令歸車徒甚眾將入郡界乃謝遣賓客曰吾輿服豈可使許子將見遂以單車歸家

孔嵩字仲山為新野縣阿里長正身厲行街中子弟皆服其訓化遂辟公府之京師道宿下亭盜共竊其



馬尋問知其嵩也乃相責曰孔仲山善士豈宜侵盜乎於是送馬謝之

王扶少脩節行客居瑯琊不其縣所止聚落化其德徐穉豫章南昌人異行矯時俗閭里服其德化有失物者縣以相還道無拾遺太守請署功曹後舉有道家拜太原太守並不就

蘇純字桓公扶風平陵人性強切而持毀譽士友咸憚之至乃相謂曰見蘇桓公患其教責人不見又思之三輔號為大人大人長老之稱言尊事之也後官至南陽太守

孫期濟陰成武人少為諸生習京氏易古文尚書遠人從其學者皆執經壘畔以追之里落化其仁讓黃巾賊起過期里陌相約不犯孫先生舍

桓曄字文林沛郡人也議郎鸞之子避地會稽浮海客交阯越人化其節至閩里不爭訟仕為郡功曹王孫瑞每三公缺楊彪皇甫嵩皆讓位於瑞後官至僕射

劉虞東海鄉人為幽州刺史以疾歸家時鄉曲有所訴訟不以詣吏自投虞以情理為之論判皆小大敬從不以為恨

用符元龜 總錄部 卷之三百八十七 六

王烈字彥方太原人少師事陳寔以義行稱鄉里有盜牛者至得之盜請罪曰刑戮是耳乞不使王彥方知也烈聞而使人謝之遺布一端或問其故烈曰盜懼吾聞其過是有耻惡之心既有耻惡必能改善故以此激之後有老父遺劍於路行道一人見而守之至暮老父還尋得劍因而問其姓名以事告烈烈使推求之乃先盜牛者也諸有爭訟曲直將質之於烈或至塗而反或望廬而還其以德感人若此察孝廉三府並辟皆不就會董卓作亂避地遼東躬秉農器編於四民布衣蔬食不改其樂東域之人奉之若君

時衰世弊識真者少朋黨之人互相讒謗自避世在東國者多爲人所害烈居之歷年未嘗有患使遼東強不凌弱衆不暴寡商賈之人市不二價曹公累徵不至

龐德公襄陽人諸葛孔明每至其家獨拜牀下德公初不令止荆州刺史劉表數延請不能屈後携妻子登鹿門山採藥不返

魏徐裔漢末盜賊縱橫敬裔禮行轉相約勅不犯其間

管寧漢末避地遼東民化其德左右無鬪訟之殼禮

讓移於海表與人子言教以孝與人弟言訓以悌言
及人臣誨以忠貌甚順觀其行邈然若不可及卽之
熙熙然甚柔而溫因其事而寧之於善是以漸之者
無不化焉寧之亡天下知與不知聞之無不嗟嘆醇
德之所感若此不亦至乎後詔書徵不起而卒
胡昭潁川人轉居陸渾山信行著於鄉黨百姓聞馬
超叛避兵入山者千餘家飢乏漸相劫掠昭嘗遜辭
以解之於是寇難消息衆咸宗焉故其所居部落中
三百里無相侵暴者
蜀向朗爲諸葛亮丞相長史免官歸成都開門接賓

誘納後進講論古義不干時事以是見稱上自執政
下及童冠皆敬重焉

楊儀兄慮字威方少有德行爲江南冠冕州郡禮召
諸公辟請皆不能屈年十七天鄉人宗貴號曰德行
楊君爲諸葛亮丞相長史中軍師

朱冲字巨容南安人居近夷俗羗戎奉之若君冲亦
以禮讓爲訓邑里化之路不拾遺材無凶人毒蟲猛
獸皆不爲害

晉蔡克陳留考城人博涉書記爲邦族所敬性公亮
守正行不合已雖富貴不交也高平劉整恃不縱誕

服飾詭異無所拘忌嘗行造人遇克在坐整終席慙不自安克時爲處士而見憚如此

東晉陽平元城人爲趙王倫記室罷歸教授門徒年四十卒元城市里爲之廢業門生故人立碑墓側華表爲太嘗以光祿大夫致仕表性清淡嘗慮天下退理司徒李喬司隸王密等嘗稱曰若此人者不可得而貴不可得而賤不可得而親不可得而踈賀循爲元帝軍諮祭酒有清德伏於一時廷尉張閭任在小市將奪左右近宅以廣其居乃私作都門早閉晏開人多患之訟於州府皆不見省會循出至破

關連名詣循質之循曰見張廷尉當爲言及之闔閭而遂毀其門詣循致謝其爲世所敬服如此

宋張進之永嘉安國人少有志思行義闢於鄉里時劫掠充斥每入村抄暴至進之明輒相約勒不得侵犯其信義所感如此歷郡五官主簿

范叔孫吳郡錢塘人少而仁厚固窮濟急鄉里貴其義行莫有呼其名者除竟陵王國中軍將軍不就南齊何伯瑛廬江人與弟幼瑛俱屬節操誨人不倦鄉里呼爲人師郡守下車莫不脩謁

梁嚴植之性謹厚不以所長高人又仁慈好陰德雖

在開室未嘗怠也官至中撫軍記室參軍兼五經博
士

陳虞寄會稽餘姚人為建安王諮議以疾加大中大
夫及謝病私庭每諸王為州將下車必造門致禮命
釋鞭板以几杖侍坐嘗出遊近寺間里轉相告語老
幼羅列望拜道左或言誓為約者但指寄便不欺其
至行所感如此

馬樞扶風郿人傳極經史尤善佛經少屬亂離每若
之處盜賊不入依託者常數百家文帝以度支尚書
徵不起

後魏呂顯字明東平壽張人性廉直鄉人分爭者皆
就而質焉

北齊李元忠趙郡伯大夫也後魏孝明時盜賊蜂起
清河有五百人西戍還經南趙趙郡以路梗共投元
忠奉絹千疋元忠唯受一匹殺五羊以食之遣奴為
導曰若逢賊但道李元忠遣送奴如其言賊皆拾避
終於驃騎大將軍開府儀同三司

隋李士謙趙州平棘人仕魏為廣平王府參軍自以
少孤未嘗飲酒食肉口無殺害之言隋有天下畢志
不仕開皇八年終於家時年六十六趙郡士女聞者



莫不流淚曰我曹不死而今李參軍死乎會葬者萬餘人鄉人李景伯等以士謙道著丘園條其狀詣尚書省請先生之謚事寢不行遂相與樹碑於墓

徐孝肅汲郡人宗族數千家多以豪侈相尚肅性儉約事親以孝聞雖在幼齒宗族間每有爭訟皆至肅所平論之爲肅所短者無不引咎而退後母卒負上成墳廬於墓所四十餘載而卒

張文詡江東人每以德化人鄉黨移風俗閒居而卒年四十而鄉人立碑號張先生焉

柳儉河東解人也少有局量立行清苦爲州里所敬雖至親昵無敢狎侮官至上大將軍

唐張玄素蒲州虞鄉人隋末爲景城縣戶曹竇建德攻陷景城玄素被執將戮縣民千餘人號泣請代其命曰此人清慎殺之乃無天地大王將定天下當深加禮接以招四方如何殺之使善人解體建德遽命釋之

楊綰華州華陰人素以德行者或造之者清談終日未嘗及名利或有客欲以世務干者見綰言必玄遠不敢發辭內愧而退位至中書侍郎平章事

陽城字亢宗隱河東條山下遠近慕其德行來學者

相繼於道閭里有爭者不詣官府詣城以決之終於
道州刺史

甄濟字孟成中山無極人隱居衛縣青巖山環山之
人服其操行約不畋漁探訪使表薦為范陽節度掌
書記

德行

夫孔門四科德行為首是知行者人倫之本衆善之
源故君子立身行道造次不違乘之以端方守之以
淳固仁近之矣乃有能降其志不苟於得必以中慮
匪以利回靡息曲木之陰罔取非義之給盛衰一致

死生等節至於千里赴弔於知己皓首罔渝於締交
繇是白圭無玷閭室不欺敦厚之風行於鄉里徽音
之美播於簡書士之所為良足尚矣

孔子絕四母意以道為度故不任意母必用之則行舍之則藏故無專必母固

無可無不可母我述古而不自作處群而不自異唯是之從故不有其其身

顏回字子淵閔損字子騫冉耕字伯牛冉雍字仲弓
孔子皆以為有德

子路有聞未之能行唯恐有聞前所聞未及行故恐後有聞不得並行

柳下惠少連降志辱身言中倫行中慮其斯而已矣
但能言應倫理行
應思慮如此而已

後漢淳于恭初遭賊寇百姓莫事農桑恭嘗獨力耕
田鄉人止之曰時方淆亂死生未分何空自苦為恭
曰縱我不得它人何傷墾耨不輟後至侍中騎都尉
承官嘗出行得虎所殺鹿持歸肉分門下取皮上師
不受官因棄之人問其故官曰既已與人義不可復
取後至侍中祭酒

張湛字子孝右扶風人以篤行純淑鄉里歸德雖居
幽闇自整頓三輔以為儀表為太中大夫

徐穉公府辟皆不就人有死喪負笈赴弔嘗於家豫
炙雞一隻以兩緜絮漬酒中暴乾以裹鷄徑到所赴

冢隧外以水漬緜使有酒氣斗米飯白茅為藉以雞
置前醲酒畢留謁則去不見喪主穉嘗為太尉黃瓊
所辟不就及瓊卒歸葬穉乃負糧徒步到江夏赴之
設雞酒薄祭哭畢而去不告姓名

魏袁與行足以厲俗言約而理當終於光祿勳

任嘏幼號神童及漢末荒亂家貧賣魚會官稅魚魚
貴數倍嘏取直如嘗又與人共買生口各崔八疋後
生口家來贖時價直六十疋共買者欲隨時價取贖
嘏自取本價八疋共買者慙亦退還取本價

吳陳表少知名與諸葛恪顧譚張休等並侍東宮皆

共親友尚書暨豔亦與表善後豔遇罪時人咸自營
護信厚言薄表獨不然士以此重之表俄徙太子中
庶子拜翼正都尉
晉羊祐妻夏侯霸之女及霸之降蜀也姻親多告絕
祐獨安其室恩禮有加焉徵拜中書侍郎
劉寔少貧窶杖策徒行每所憇止不累主人薪水之
事皆自營給後至太嘗
宋阮長之爲散騎侍郎在中書省直夜往隣省誤著
履出閣依事自列門下門下以闇夜人不知不受列
長之固遣送之日一生不悔闇空

郭世道察孝廉不就少有學行仁厚之風行於鄉里
隣村大小莫有呼其名者嘗與人共於山陰市貨物
誤得一千錢當時不覺分背方悟請其伴以求此錢
追還本主伴大笑不答世道以已錢充數送還之錢
主驚嘆以半直與世道世道委之而去

朱百年會稽山陰人也少有高情親亡服闋攜妻孔
氏入會稽南山伐樵採藥爲業以樵藥置道頭輒爲
行人所取明旦又復如此人稍恠之積久方知是朱
隱士所賣隨其所取多少留錢取樵藥而去

南齊崔慰祖爲始安王刑獄叅軍賣宅四十五萬買

者云寧有減不答曰誠慙韓伯休何容二價買者又曰君但賣四十六萬一萬見與慰祖曰是卽同君欺人豈是我心乎

虞悰爲正員嘗侍卒性敦實與人知識必相存訪親踈皆有終始世以此稱之

徐伯珍徵辟不就舉動有禮過曲木之下趨而避之辛普明兄將葬隣人嘉其義賻助甚多普明初受後皆反之贈者甚恠普明曰本以兄墓不周故不逆來意今何忍止者餘物以爲家財

周山圖爲黃門郎與人周旋皆白首不異

梁甄彬有行業鄉黨稱善嘗以一束苧就州長沙寺庫質錢後贖苧還於苧束中得五兩金以手巾裹之彬得送還寺庫道人驚云近有人以此金質錢時有事不得舉而失檀越乃能見還輒以金半仰酬往復十餘彬堅然不受因詠曰五月披羊裘而負薪豈拾遺金者耶奉還金

何遠東海鄉人爲東陽太守免歸還輕財好義周人之惡言不虛妄蓋天性也遠無戲言嘗語人云卿能得我一妄語則謝卿以一縑衆共伺之不能記也

陳歐陽頴爲廣州刺史征南將軍初交州刺史袁曇

緩密以金五百兩寄顧令以百兩還合浦太守龔爲
四百兩付兒智矩餘人弗之知也顧尋爲肅勃所破
資財並盡唯所寄金獨在曇緩亦尋卒至是顧並依
信還之時人莫不嘆伏其重然諾如此
殷不佞爲散騎嘗侍兼尚書右丞不佞事寡嫂張氏
甚謹所得祿俸不入私室

後魏崔降宗爲大將軍府長史仁信待物出以至誠
故見重於世也

辛穆字叔宗舉茂爲雍州別駕初隨父在下邳與
彭城陳敬文友善敬文弟敬武少爲沙門從師遠遊
經久不反敬文病臨卒以雜綾二十疋寄穆與敬武
穆久訪不得經二十餘年始於雒陽見敬武以物還
之封題如故世稱其廉信

趙柔少以德行知名爲河內太守柔嘗在路得人所
遺金珠一貫價直數百縑柔呼主還之後有人遺柔
錢數百枚與子善明鬻之於市有人從柔買素絹二
十疋有商人知其賤與柔三十疋善明欲取之柔曰
與人交易一言便定豈可以利動心也遂與之搢紳
之流聞而敬服

鹿念嘗詣徐州馬疲附船而至大梁夜睡從者上岸

竊禾四束以飼其馬船行數里念覺問得禾之處從者以告念大忿卽停船上岸至取禾處以縑三丈置禾束下而反後至梁州刺史

趙琰天水人皇興中京師儉婢簡粟糶之琰遇見切責勅留輕糶嘗送子應冀州聘室從者於路遇得一羊行三里而琰知之令送於本處又遇路傍主人設羊羹琰訪知盜殺卒辭而不食遣人買糶亦得利六百卽令送還亦主亦高之義而不受琰命委之而去後至淮南王府長史

後周寇雋性廉恕不以財利爲心家人曾賣物與人

而剩得絹五疋雋於後知之乃曰惡木之陰不可暫息盜泉之水無容誤飲得財失行吾所不取也遂訪主還之其雅志如此後至驃騎將軍開府儀同三司隋張處威爲謁者大夫攝江都贊治嘗在途見一遺囊恐其主永失因令左右負之而後數日物主來認悉以付之

趙軌開皇初爲齊州別駕其東鄰有桑椹落其家軌遣人悉拾還其主誠其諸子曰吾非此求名意者非機杼之物不願侵人汝等宜以爲誠爲原州總管司馬在道夜行其左右馬逸入田中暴人禾軌駐馬待

明訪禾主酬直而去原州人吏聞之莫不改操
唐于邵爲太子賓客性孝悌內行脩潔老而彌篤
武儒衡字庭碩才度俊偉氣直貌莊言不妄發與人
交友終始不渝
班肅長慶元年自前坊州刺史爲司封員外郎時宰
臣上言曰將欲清風俗必在厚人倫竊見皇甫專權
位盛時班行之中多所親附及得罪後議論立變憎
嫉如讎俗之衰薄一至於此唯班肅以曾爲郎官判
慶支案始終如一獨送出城周行之間多美其事今
郡秩已罷望授一省官以表其行故有是拜

後唐趙光逢爲司空平章事以疾辭授司徒致仕嘗
有女冠寄黃金一鎰於其室家併屬離亂女冠委化
於他土後二十年金無所歸納於河南尹張全義請
付諸官觀其舊封尚在

册府元龜

册府元龜

總錄部

卷之七百四十七

十八

